



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მირიან ბატონიშვილი (ბაგრატიონი)



მირიან ბატონიშვილი
(ბაგრატიონი)

მირიან ბატონიშვილი (ბაგრატიონი) (19. VIII. 1766, - 15. X. 1834, სანქტ-პეტერბურგი), ერეკლე II-ისა და დარეჯან დედოფლის ძე. შედიოდა იმ დელეგაციის შემადგენლობაში, რ-იც ერეკლე II-მ გაგზავნა პეტერბურგს 1783 ტრაქტატის დადების სამზადისთან დაკავშირებით. 1784 კვლავ გაემგზავრა რუსეთში, იქვე დარჩა და რუს. სამსახურში შევიდა. პეტერბურგიდან მიმოწერა ჰქონდა ქართლ-კახეთის სამეფო კართან. მიიღო გენ.-ლის ჩინი და სენატორობა. 1797 დასაწყისში იყო ყაბარდოს პოლკის მეთაური. მსახურობდა „კავკასიის ლინიაზე“ გენ. ი. გუდოვიჩთან. მ. ბ-მა შემოგვინახა „დავითიანის“ გურამიშვილისეული ხელნაწერი და არბა. 1798 იანვარში, ერეკლე II-ის გარდაცვალების შემდეგ, გათავისუფლდა რუსეთის სამსახურიდან საქართველოში დაბრუნდა და აქვე დარჩა.

1801 წ. 15 მარტიდან თავისი ყმა-მამული სამართავად დაუტოვა დედას და პეტერბურგში დასახლდა, სადაც ეწეოდა ლიტ. და მთარგმნელობით მოღვაწეობას. რუსულიდან თარგმნა „სწავლა თქმული ილია მინიატისაგან“ (A-1448), ბრავეს ტრაგედია „ათეისტი“ (H-2321). ავტორია რამდენიმე იამბიკოსი. დაკრძალულია ალექსანდრე ნეველის ლავრაში.

წყარო: ბ ე რ ძ ნ ი შ ვ ი ლ ი მ., მასალები XIX საუკუნის პირველი ნახევრის ქართული საზოგადოებრიობის ისტორიისათვის, თბ.; 1983; გ უ რ ა მ ი შ ვ ი ლ ი დ., დავითიანი, ალ. ბარამიძის რედ., თბ., 1955; საქართველოს სიძველენი, ე. თაყაიშვილის რედ., ტ. 2-3, ტფ., 1909-10; Грамоты и другие исторические документы XVIII столетия,

относящиеся до Грузии, под ред. А. А. Цагарели, т. 2, в. 2, СПб., 1902.

მ. ბერძენიშვილი
